

左恪靖侯奏稿續編

恪靖奏稿續編卷十八目錄

北路官軍大勝摺

榆林邊境各軍擊賊獲勝片

回逆求撫未可深信片

劉松山徑搗賊巢獲勝並剿敗北竄回逆現籌安撫摺
請飭部撥餉採糧接濟摺

西南路各軍剿回土各匪叠勝摺

榆林綏德一律肅清片

北路官軍大勝摺

奏爲北路官軍大獲勝仗據實馳陳仰祈

聖鑒事竊榆林綏德州一帶疊獲勝仗情形業經臣等
於十二月初十日馳報嗣據署綏德州知州道銜知府
成定康等稟報十一月二十七日進剿清澗之賊師次
石嘴驛訶知駱駝鋪柏樹圪樓子場王家溝一帶均有
大股盤踞成定康軍至駱駝鋪賊已分踞郝家山一帶
排陣來迎成定康令營官鄧萬盛李占榮等先伏於柳
莊山之旁以防抄襲之賊乃三路鼓行而前賊從郝家

山一齊衝出柏樹抵樓子樹王家溝之賊亦蜂擁而至
勢殊驕其戒定康令營官殷忠廷戴光明各率所部當
左右兩路而白率喻先恕及馬隊當中路忽騎賊數百
躍馬橫戈從柳莊山口而出爲鄧萬盛李占榮等伏兵
所敗賊爲奪氣官軍知其餒也遽前薄之哨長周克齊
首先踏陣喻先恕繼之殷忠廷戴光明左右銳進賊不
能支紛紛敗潰追殺三十餘里斃賊千餘名救出難民
數百而清澗北境各處之賊均向老君殿一帶奔竄成
定康收隊馳抵清澗縣城時已二鼓矣知縣趙奎灝請

剿西南清溝峪原家溝踞賊適劉厚基所部後營官知縣梁以恭已馳抵縣城二十八日梁以恭追賊老張圪則賊已遠颺僅斬其斷後騎賊百數十名而還成定康旋即收隊回城戌刻探報縣東李家寨周家圪塆高家嶺一帶冇賊數千攻民寨甚急成定康令各營蓐食潛師擊之二十九日午刻馳抵麻子圪距李家岔約四五里偵賊方撲李家寨成定康令梁以恭由左殷忠廷繼之喻先恕由右鄧萬盛李占榮繼之親率戴光明爲中路馬隊繼之行甫二里馬步賊數千紛來抗拒中路官

軍悉銳奮擊正圍戰間右路已由槐黃峪截出賊潰走高腰坂成定康飭李長樂領馬隊衝殺步隊分路兜剿賊屍枕籍左路方進周家圪塆適賊由後抄襲梁以恭回旗力拒殷忠延飭所部分左右翼抄之賊潰走高山嶺官軍三路會合窮追十餘里斃賊數百名生擒百餘名此署綏德知州成定康剿清澗股匪獲勝情形也劉松山全軍馳抵山西永甯州訶知賊衆聚擾榆林東北晉軍扼之東岸而豫軍記名提督張曜已馳抵河曲料北路可以無虞乃急購行糧爲渡河擊賊計十二月初

三日前隊渡河抵綏德州留所部三千人於山西之軍
渡地方防東岸初六日率所部馬步馳抵綏德州城晤
商成定康以賊擾榆林其大股麇聚榆林西南懷遠縣
之小理川大理川以及安定保安塞靖邊一帶必不
料官軍由山西兜剿而西也宜及其猝不及備直搗各
股老巢庶榆林邊內邊外各賊急於回顧而榆林及歸
綏可以解嚴初八日劉松山率所部由綏德州西行繞
北路由岔把溝自北而南成定康由州西七十里大理
川自南而北會師夾擊是夜劉松山行至吳家山訶北

路無賊賊巢在小理川之南大理川之北縱橫二十餘里劉松山飭提督易德麟率前軍蘇松鎮總兵張合才率左軍並馬隊前營右營先攻大理川西續家灣一帶賊巢兼扼其竄西北之路劉松山俟其拔行十餘里後親率中軍及馬隊中營後營由右進飭提督蕭章開率右軍由左直撲大理川一帶賊巢前行二十里賊已驚覺紛紛出巢抗拒排列十餘山氣殊驕甚劉松山飭各軍奮威衝殺賊不能支奪路狂竄官軍乘勝壓擊立將大理川店子寺一帶賊巢二十餘處一律掃蕩賊向山

南大理川周家嶺而竄騎賊數百不能越山沿小理川西遁中後兩營馬隊追及殲之官軍追近周家嶺數里沿途賊屍枕藉敗賊見官軍緊逼不敢入周家嶺老巢而巢中羣賊競出村排隊抗拒劉松山分步隊兩支由左路一枝由右路一支爲後拒馬隊從右路之右斜抄而出正布陣間賊呼躍而前搗戰甚急官軍靜以待之少頃鼓聲起三路殺入賊遂大敗棄巢竄附近各賊見周家嶺大巢已填不戰而潰時則新月初升官軍分路追殲數里沿途擒斬無算是日成定康由三皇峯進午

刻行抵樓兒砭見賊壘數座橫踞道旁成定康飭各營更番迭進不遠猛撲意俟劉松山攻破周家嶺賊無所歸可多殺也未正留陝補用總兵喻先恕湖南補用副將戴光明參將張德榮遊擊殷忠廷易培文成景星鄧萬盛都司古楚南李志剛李占榮守備余發勝把總李長樂福建候補同知陳瑞芝各率銳卒仰攻火器環轟壘賊膽落官軍乘勢奮躍先登連破十餘壘殺賊無算復搗三眼泉劉家坪一帶卡壘破之追八九里適劉松山已連踏賊壘破周家嶺大集而來兩軍會合縱擊

賊更披靡窮追西南六七里如令收隊是夜五鼓易德麟章合才適由大理川西續家灣一帶掃蕩而來踏平賊壘二十餘處擒斬亦多計是役共破賊壘百餘十處斃賊五六千名生擒三千餘名解散脅從二萬有奇奪獲騾馬驢三千餘匹此十二月初九日劉松山成定康兩軍大破綏德懷遠各處賊巢實在情形也初十日劉松山成定康派隊搜山均有擒斬是夜三鼓劉松山飭易德麟章合才率前左兩軍及各右後兩營馬隊向西南追剿自率中軍與蕭章開所部右軍及中前兩營馬

隊會合成定康一軍分兩路西追行六十里卽與大股賊遇劉松山商令陳定康由右路自率所部步軍出左路馬隊出左路之左相機抄襲賊見官軍驟至駭而奔僅留悍賊殿後官軍乘勢蹙之悍賊亦奔蹙追二十里及之南岔路狹溝深賊擁擠不前官軍數面縱擊登時擒斬千餘名其越山潰走者尙數千又追十餘里沿途擒斬無數是夜各軍就地安紮二更陳定康向西繞北而進劉松山率蕭章開及馬隊向西進行三十餘里見小理溝火光長約數十里劉松山因溝狹山高不便列

隊飭蕭章開右軍先進親率中軍繼之馬隊居後魚貫而行獲賊探數名訊知賊畏剿甚前隊已行後股待發蕭章開卽分兩路沿溝而進時曉日東昇瞥覩前途賊衆擁擠聞官軍號聲遽行返撲蕭章開率所部奮勇衝殺斃殿後悍賊甚多賊悉潰走蕭章開急躡之其循左路岔溝奔竄者約一二千名劉松山麾中軍擊之擒斬殆盡其右路竄去者經成定康緊追擒斬甚衆亦鮮脫者惟越山逃逸者約七八千均向西路狂奔而去十三日卯刻劉松山率馬步各軍急追行五十里許復遇敗

賊且追且擊賊狂奔不止追二十餘里忽遇成定康軍至截其去路賊向西南狂竄兩軍夾擊其紛向西北下溝者經成定康截殺殆盡其向西南竄去者劉松山截殺至李家岔沿途斃賊一千數百名拔出難民數千奪獲騾馬器械無算收隊時初更矣旋晤易德麟章合才據稱十一日馳至宋家坪探報距營四十里玉梯山一帶冇賊盤踞是夜分路襲之掃平賊巢二十餘處賊向西南紛竄易德麟章合才及馬隊會合猛追賊狂奔不止道右一村頗大踞賊約七八百未及竄走官軍分兩

營圍之賊目鄭有才出降官軍一面受降一面躡蹤進剿又追二十餘里沿途斃賊約二千有奇生擒近千拔出老少男婦不下數千時已午正易德麟章合才令頓隊少憩傳餐未刻又整隊繼進行十餘里將近瓦窰堡巨巢敗賊正在造飯聚隊不虞官軍復至也倉忙出竄易德麟等飭馬隊從堡兩旁抄出步隊分數起截殺將賊衝爲數段賊屍遍野又追二十餘里至樂家坪時已二鼓矣十三日復追至南川僅截殺尾賊數百餘賊已向西南散竄易德麟等因裹糧已罄不能再追遂收隊

回安定縣就辦行糧通計劉松山所部全軍及成定康一軍上臘十一二十三等日殺賊萬餘生擒賊匪約五千有奇內有大小頭目四五十名因日夜追剿奔馳均於陣前正法未遑研訊也奪獲戰馬騾驢四千五百餘匹器械無算拔出難民以數萬計劉松山全軍僅陳亡弁丁十五名受傷二十七名成定康一軍僅陣亡五名有哨長藍翎把總杜宗太一名受傷將弁勇丁二十九名而已成定康以綏德州職守攸關而所屬米脂有股匪攻撲堡寨遂稟商劉松山撤隊回州劉松山以竄

擾草地及榆林邊內外之賊係逆首董福祥黨夥而老
巢則在靖邊由榆林至靖邊一帶賊巢林立官軍由綏
德州西北西南迤邐而前已有大蛇中斷之勢若引軍
而西節節搜剿則榆邊內外之賊必急於回顧而東北
一帶河防自可解嚴特邊牆內外被賊擾掠已久商旅
不通前路無可因之糧就地無可移之粟而各軍所持
行糧又已告罄裹帶無貲殊深焦灼十四日屯軍安定
僅獲粟米六千餘斤卽率所獲騾驢雜者充食是夜三
鼓率各軍向西北進行五十里適道充鄉導之降卒飛

報敗殘首逆李雙良高萬全率其黨亦向西北竄走現
與官軍僅隔胡家山一山劉松山卽令易德麟蕭章開
各率所部前左兩軍立由右進小川繞出賊北截之右
後兩營馬隊護其輜重俟兩軍拔行半時許劉松山自
率中軍直合才率左軍分路西進橫擊之踰胡家山而
西聞鎗礮聲緊知易德麟蕭章開兩軍已接仗矣劉松
山麾中左兩軍急進賊見官軍馳至駭而奔官軍躡追
至小李莊截賊數段兩路沿途擒斬約千餘名拔出難
民數千名收隊回胡家山尋訪土人知小李莊之北四

十里爲隆腰鎮鎮西北爲黑牛川邱家坪兩處相距二十里三巢皆賊首董福祥之黨也是夜四鼓劉松山率各軍疾進十五日辰刻馳抵隆腰鎮賊已於先夕初更遁合黑牛川邱家坪兩巢矣劉松山親率易德麟由右向邱家坪先進飭章合才蕭章開遲半時許率所部由左以向黑牛川蓋邱家坪較黑牛川遠十餘里欲其取齊會剿也劉松山兩軍行三十餘里甫近邱家坪賊卡賊已列隊出拒左右兩山有賊如林旗械亦整劉松山飭易德麟分其軍爲兩左右攀躋擊兩山之賊而自率

中軍分前後隊直撲賊卡逼卡里許揚旗吹號蹙之時左右兩路亦均搶上半山三路鎗礮齊轟聲震山谷賊乍覩軍威惶駭殊甚礮止煙銷見賊陣已動急起乘之立將邱家坪賊巢攻破乘勢猛追八里許沿途又掃賊巢十餘處適張合才蕭章開亦破黑牛川馬營灣一帶賊巢十餘處而來兩股敗賊已歸併一路官軍排追數里沿途賊屍駢列計共斃賊千五六百名解散脅從數千名兩口共奪騾驢二千餘匹軍械七八千件敗賊竄逸鎮靖堡官軍二鼓收隊點驗勇丁陣亡三名受傷十

二名而已是夜提訊陣擒賊目孔福興呂萬源朱有祥
李益昭周其慶李元福何良如等均供鎮堡靖堡堅固
董福祥恃爲巢穴其眷屬則竊踞靖邊縣城訛畢斬之
劉松山擬次日進攻鎮靖堡逕搗賊巢待榆邊賊還救
而傾之尙未接其續報則師行日遠北山之北驛路處
處梗阻軍報須從榆綏營遞山西乃達西安也臣等竊
維榆延北境橫抵甯夏正當河套迤南古爲用兵之地
自陝回倡亂甘回繼之環慶平涼民人自相團結以與
回鬥敗喪之餘流爲盜賊情實可原董福祥高二扈彰

之徒阻兵多年官軍未遑征討浸假而失業無賴之徒
附之浸假而飢軍潰卒附之旋又勾結甘回蘇阿渾等
助逆馴致戕官踞城潛圖遠竄而罪乃不可赦矣上年
扈彰畏罪輸誠投臣典營次求撫臣典受之爲之安插
延安其黨之散附高逆者不少故高逆一股多至十餘
萬衆以兼有扈彰之黨也此次劉松山成定康所剿者
高逆巨股其漏遺者實已不過數千其大小頭目殲除
殆盡傾接延安守將劉厚填刑部主事周瑞松報十二
月二十四日李雙良高萬全南竄距延安五十餘里之

人和寨不過騎賊數百步賊數千經劉厚填周瑞松派
降殺剿復斃賊數百名生擒三十餘名其窮蹙可想臣
等前接成定康稟李雙良乞撫曾允其分別安插不意
其猶豫不決自取殲滅也劉松山全軍抵永甯時知北
路榆郡一帶兵力漸厚遂決計渡河西剿直搗賊巢竭
六晝夜之力轉戰七百餘里實有勁風掃箐之勢計其
擒斬數萬拔出難民數萬奪獲戰馬騾驢七千有奇軍
械山積洵足伸

天討而快人心十五六兩日劉松山所剿之賊卽董福

祥悍黨計重逆聞大軍深入必急於回救榆邊內外白
可解嚴而春令漸深河永待泮首防或可無虞其於大
局實有裨益惟師行既遠裹糧告罄臣等雖籌銀委員
在山西永甯採運軍食而距該軍數百里轉運不前所
慮不在賊多而在糧運不繼雖聞大捷仍不免有喜而
憂陝甘軍務較難於各省將士苦況較甚於各省者此
也所有尤爲出力之將領士卒已飭存記聽候巢懇
恩施伏乞

皇太后

皇上訓示施行謹

奏 同治八年正月十三日

榆林邊境各軍擊賊獲勝片

再北路榆林邊境之賊東窺河干北侵草地均首逆董福祥族之董福祥寄其拳於境邊而率其醜類四出剽掠較李雙良爲狡上年十二月初四日記名提督張帑飭前起各營官總兵王連三遊擊王明泰提督楊春祥副將徐效孟於是夜二鼓由河曲履水渡河先攻法寺胡灣之賊斃賊三四百名楊春祥追至古城子復斃賊

百餘名獲馬二百餘匹初六初八等日楊春祥等擊石
界子各處騎賊均有擒斬張曜令王連三等進駐五拉
合蘇自率所部渡河會剿十三日副都統全順延綏鎮
總兵劉厚基由十里長灘會商張曜由五勞不拉向北
路進行約百里距準噶爾貝子營盤二十里之慶達瓦
廟探報有賊在敢執漢盤踞未動卽督隊前進行抵拉
林一帶遙見溝中火光隱隱騎賊數百正在造飯遽前
薄之擒斬數十名獲馬百餘賊卽潰竄張曜督所部緊
躡賊蹤追二十里收隊暫駐瞥見迤西西北火光燭天

張曜令各營募食聽令五鼓親率各營由敢執漢盤溝
西進行三十里訶賊尙踞達拉川遂整隊前進徐效孟
楊春祥王明泰等見賊卽擊賊紛紛敗潰張曜麾各軍
追之擒斬數百名賊分路鼠竄一向正西一向西南猶
盤旋邊外各處張曜督各營緊追十四夜乘月色皎潔
馳七十餘里抵臺陽川二庫地方訶賊衆悉聚於此張
曜飭李富貴王明泰潛繞西北截賊去路飭各隊分路
壓擊連踏賊巢三十餘處斬馘遂多十五日黎明正分
隊搜殺間忽有賊步騎數千紛紛回撲官軍整隊迎擊

賊不能支屍橫遍野陣擒賊目馬明及陳彥王守成蘇旺林等二百餘名訛明軍前正法解散脅從數百名官軍陣亡者僅千總胡桂發及勇丁二名受傷十七名而河西及準噶爾地貝子境內均無賊蹤此張曜一軍由河曲履永而西連獲勝仗實在情形也其金順劉厚基兩軍據報十二月初六日波羅營西有大股賊竄至酌留副將萬金榮遊擊李考祥三營守波羅扼之自帶所部七營步隊及馬隊百餘名兼程東行十二月初六日馳抵府谷之鎮羌堡探知賊距邊外古城法寺胡家灣

直至十里長灘地周百餘里初九日五鼓金順率所部及劉厚基之中營前進行四十餘里遇賊數千擊敗之擒斬約千餘名是日駐軍古城覘賊踞十里長灘初十日劉厚基率馬步三營會剿十一日進攻賊已於先夕棄巢先遁矣金順劉厚基尾追二百餘里直抵哈慶當王廟收隊沿途斃賊近千名生擒數十名十四日仍回駐古城賊已悉數西竄晤商張曜暫留古城金順劉厚基遂折回榆林剿葭州米脂之賊十九日抵榆劉厚基接據所部後營知縣梁以恭稟報初十夜率該營弁勇

已將米脂桃花茆攻寨之賊擊敗斃賊數百名寨圍遂解臣等竊維竄犯歸綏榆林之賊及葭米之賊皆董福祥等黨夥經張曜金順劉厚基成定康疊次擊敗劉松山又急由綏德掃蕩而西搗其巢穴東北敗餘之賊必急於回顧可知不但歸綏邊境遊氛漸斂卽榆林綏德亦廓清有期北路機局實爲順利附片陳明仰慰
慈廑伏乞

聖鑒訓示施行謹

奏

同治八年正月十三日

回逆求撫未可深信片

再董志原回逆上年十二月初旬以前迭經官軍擊敗情形已經_臣等馳報其初旬以後仍一面求撫一面分途竄犯迭經各軍剿敗現又遞呈求撫其情詞亦漸近軌轍而包藏禍心仍所不免_臣等未敢將就了事仍飭各軍戒備如初大約回中種類不一心亦不齊其求撫雖是真心而各懷自便之圖未可以尋常賊情忖度_臣等惟當和衷商榷以求一了百了所有各軍戰勝情形容卽續報伏祈

聖鑒訓示施行謹

奏 同治八年正月十三日

軍機大臣 字寄同治八年正月十八日奉

上諭左宗棠等奏北路官軍獲勝剿辦竄邊賊匪續獲
勝仗回逆求撫未可深信各摺片覽奏均悉成定康劉
松山等軍由清澗及綏德等處進剿疊獲大捷事機極
爲順利在事尤爲出力之將領士卒著左宗棠等存記
彙案保奏候旨施恩匪勢現極窮蹙左宗棠庫克吉泰
劉典務當飭令各軍乘此聲威分路進攻將敗殘餘匪

悉數殲除爲次第廓清之計董福祥恃鎮靖堡爲堅巢
其眷屬則竊踞靖邊該逆一日不除賊黨一日不盡著
左宗棠等檄飭劉松山統所部進攻鎮靖堡逐擄賊巢
迅殲醜類惟師行日遠轉饋愈難應如何源源接濟俾
軍食不致缺乏之處著該大臣等妥籌辦理竄邊逆匪
經張曜等疊次擊敗劉松山又由綏德掃蕩而西直搗
董福祥老巢該逆急於回顧不但歸綏游氛漸斂卽榆
林等處官軍剿辦亦易得手著左宗棠等激勵將士迅
赴戎機毋稍延緩董志原回逆首鼠兩端現又求撫左

宗棠等恐其包藏禍心未敢將就了事所見甚是該大臣等務當相機妥爲辦理勿稍大意將此由六百里各諭令知之欽此

劉松山徑搗賊巢獲勝並剿敗北竄回逆現籌安撫摺

奏爲劉松山一軍徑搗賊巢殲擒餘逆並截剿北竄逆獲勝現籌安撫事宜仰祈

聖鑒事竊劉松山上臘十六日大獲勝仗後擬十八日進攻鎮靖堡業經臣等於正月十三日馳報其時方以未得劉松山續報爲疑拜摺後接劉松山除日捷報始知上臘二十日曾將十八日追至鎮靖堡董福祥跪乞投誠應否准予安置各事宜馳稟請示臣等迄未接到

料是驛遞沈失應俟行查據劉松山續發報稱二十日發稟後卽催董福祥之父董世有及董福祿迅將鎮靖堡及靖邊縣城所有降衆難民造冊呈核旋據董世有訴稱各股徒衆疊蒙截剿其畏誅者或向榆林米脂一帶或向延長竄逸董福祥隨身三四千人未知竄向何處現已專人喚回稟懇寬限數日其扈衛餘黨未就撫者經疊次剿辦亦詣鎮靖堡造冊乞撫南路探報賊首李棟卽李登李雙良張萬會卽張萬飛姬滿春等糾集餘黨屯踞洛珠川一帶距堡一百三十餘里二十三日

劉松山飭章合才率左軍蕭章開率右軍及右後兩營馬隊取道烏牛川進剿正拔行間西路探報有回逆一股由西而來屯踞定邊縣屬之高小灣距堡西一百三十里劉松山自率中軍飭易德麟率前軍卽夜三鼓潛師西進令步隊兩營守老營護輜重二十四日行一百里駐張家溝馬隊營官提督余虎恩擒獲回逆四名訊係回目令其假官軍裝束前來偵探者據供此股回衆約三四千皆騎馬從下馬關維州萌城一帶而來現踞高小灣回首爲馬蘭得馬棘子劉松山訊畢卽傳令三

鼓傳發出隊行二十餘里遙見高山灣一帶火光隱隱
麾軍分路急進徑逼高小灣回逆瞥聞官軍突至驚駭
失措有騎無鞍之馬亂逸者有羣馬狂奔而馬不前者
官軍急起蹙之其未及竄逸之賊敗匿民房劉松山督
中路馬步立將民房圍住前面各村之賊不復回顧各
圖逃命易德麟率所部及中軍隊伍躡蹤追之連破賊
館七八處時已天明見回逆悉向西路逃走劉松山飛
飭馬隊兩營隨易德麟步隊分路追殺十餘里擒斬約
二百餘名其高小灣被圍各悍回經中路各營搜殺淨

盡得倖脫者不過十餘人是股其計斃悍回約六百餘
名生擒二百餘名奪獲戰馬六百餘匹洋鎗三十餘桿
刀矛千餘件而官軍陣亡者二名受傷者十四名而已
二十六日停軍高小灣探報逆回已遁歸老巢二十八
日收隊還鎮靖堡適章合才蕭長開剿洛珠川之賊事
畢振旅言旋詢知二十四日五鼓師抵洛珠川出賊不
意騎賊雖列隊抗拒而步賊已紛紛潰走章合才蕭章
開整隊壓之賊向西南狂逸不止窮追三十餘里沿途
斃賊千餘名生擒三百餘名拔出難民男婦數千奪獲

驟馬二百餘匹驟驢六百頭官軍僅受傷三名而已復接留駐山西軍渡提督何作霖稟稱二十二日聞吳堡北境有賊二千由蠡喇峪竄至攻破三和源白家塌一帶民寨比卽商同提督周國勝楊清源由軍渡過河行二十餘里抵石堆山見賊圍攻民寨卽督隊猛撲賊見官軍大至解圍狂竄官軍乘勢蹙之緊追三十里至汪家渠沿途斃賊百數十名生擒四十三名奪獲驟馬八十餘匹賊敗向西南何作霖仍收隊還軍渡此劉松山全軍三剿土匪一剿回逆克獲全捷實在情形也惟是

劉松山渡河而西縱橫掃蕩由綏德而西北至懷遠折而南至安定復西至靖邊之鎮靖堡又西至定邊屬之高小灣現收隊暫還鎮靖所歷皆荒墟廢井人煙斷絕深入賊窟前無可因之糧鎮靖堡距綏德州已四百餘里綏德州距山西永甯州該軍採運軍糧之處又一百餘里餉饋不繼疊接劉松山牘稱軍糧告罄宰騾驢雜煮充飢各營運糧騾馬又芻秣闕乏多已餓斃臣等遠隔千里不能代爲設措徒切隱憂而榆延綏兩郡一州積年巨寇經劉松山此次痛剿實已震懾兵威或稽顙

輸誠或徇風迎附皆懇請免予駢誅就地安插以天理人情言之此輩初本

朝廷赤子弄兵潢池斷無抗拒之理以事勢言之此輩因禦回力竭無家可歸迫而爲匪較回逆之阻兵安忍窮蹙來歸其罪猶有可恕今辦回尙議剿撫兼施而於禦回之匪不予安插亦拂我

皇上仁育義正大德好生之心其榆延綏鎮屬災民之更宜速圖撫賑則固無論也顧安插非有見成之款就近速爲撥解不可土匪難民已多飢斃非急籌糧食速

爲散給不可而陝庫無款可籌臣等餉源早涸實屬無計可施額懇

皇上天恩飭綏遠城將軍於邊外代籌糧食交副都統金順轉輸入邊接濟均於另片陳明而榆林漸已解嚴有張曜劉厚基兩軍足資控制金順一軍應卽請旨令其拔赴靖定一帶駐紮一便轉運邊外雜糧一便防剿西路回逆於目前局勢似爲相宜臣等會籌延榆綏目前應辦事宜意見相同不得不據實陳明請旨伏乞

皇太后

皇上聖鑒訓示施行謹

奏

同治八年正月十九日

請飭部撥採糧接濟片

再陝省用兵以籌糧爲要兵燹後亦惟籌糧爲難現時
大兵雲集自延鄜迤南以至汧隴各軍所需糧食草料
或就地採辦或由外省購運來陝車駝夫馬絡繹載途
勞費萬狀延鄜各屬迤北以迄沿邊如金順劉松山劉
厚基成定康郭寶昌等所部兵勇馬步五六十營餉糧

既急轉運尤艱北山以內兵燹連年土地荒廢過多無糧可辦勢不能不於山西沿河一帶設局採購以期運捷然延綏北境如眉施安寨保安安定邊靖邊各縣地接邊荒道險且遠卽由山西採運轉輸亦苦鞭長莫及因思榆林邊外東至綏遠城西至花馬池中間附近邊牆之包頭磴口等處民人向來懇種水地產糧最多客商隨處開設牛棧囤積售賣以爲常業聞金順等頻年軍糧卽取給於此惟其地分隸綏遠城將軍所轄薩清托等五廳若由陝派員越省攜銀採運人地生疏恐

多室礙況所需糴本過鉅陝西司道各庫一空如洗各省協濟之款解到寥寥前欠既多一到卽盡無從籌此鉅款以濟急需而榆綏各屬難民降衆計男婦大小不下二三十萬口又未可坐視其槁死荒谷不得已借提江南解到劉松山軍餉銀五萬兩以二萬兩解交金順以三萬兩解交成定康作爲賑撫安插之費聊濟目前然亦杯水車薪無裨大局合無仰懇

天恩飭下戶部迅撥庫款現銀十萬兩徑解綏遠城

飭下綏遠城將軍定安速派幹員分赴各牛渠定購糧

石相度地理遠近解交副都統金順轉發成定康爲賑撫安插之用庶冀無數殘黎得沐

皇仁稍延殘喘此時距秋成之期甚遠安輯之後尙需爲籌口食需牛種耕具俾其各安耕鑿永爲良民則猶待餉項有出始能通融挹注其應手與否非_臣等所敢知也除咨請定安金順檄飭成定康辦理復函商定安懇其代展一籌並派西安佐領喜勝馳赴綏遠城面陳一切伏懇

聖慈垂念邊方殘黎飢苦情形

特允矜全

飭部速與撥解臣等曷勝感荷之至所有會籌辦理緣由謹合詞縷陳請

旨伏乞

聖鑒訓示施行謹

奏

同治八年正月十九日

軍機大臣 字寄同治八年正月二十四日奉

上諭左宗棠等奏劉松山一軍徑搗賊巢獲勝並剿敗北竄回逆匪安撫事宜及請飭部撥餉採買糧石接

濟各摺片覽奏均悉劉松山一軍自綏德掃蕩而西至靖邊之鎮靖堡又至定邊之高小灣三剿上匪一剿回匪均獲大勝洵屬謀勇兼優深堪嘉尚土匪董福祥之父董世有及董福祿畏懾聲威將鎮靖堡及靖邊縣城降衆難民造冊乞撫卹彰餘黨亦詣鎮靖堡乞降左宗棠等因其罪尙可恕不忍峻拒自係目覩其畏懾真情確有把握卽著該大臣等妥爲安插惟董福祥隨帶三四千人未經招回尙未可恃著左宗棠等嚴飭董世有迅速喚回毋令遷延變計其未投誠之賊首李棟等仍

著飭令劉松山各軍奮力追剿以淨根株陝省北山素稱瘠苦籌糧爲難亦係實情本日已飭戶部撥給部帑十萬兩解赴歸綏著定安於此項銀兩解到後派委員分赴各牛棚定購糧石解交金順大營轉發成定康以備賑撫安插之用第恐歸綏各屬一時未能得如許之糧並著定安設法採買解往毋令缺乏金順一軍前因穆圖善奏請飭赴定邊一帶會諭該副都統酌度辦理現在榆林既有張曜等軍是實控制著金順仍遵前旨如東路可以無事卽仍回靖定一帶駐紮以資堵剿將

此出六百里各諭令知之欽此

西南路各軍剿回土各匪叠勝摺

奏爲陝省西南路官軍剿辦回土各匪叠獲勝仗據實
馳陳仰祈

聖鑒事竊陝西北山延鄜甘泉一帶處處與董志原回
巢毗連回逆因飢掠食出沒靡常而土匪潰勇夜則伏
匿山巖晝則聚衆肆擾此剿彼竄蹤跡亦復無定楚軍
前路記名提督劉端冕一軍於十一月下旬由鄜州率
隊赴延搜捕附郡土匪十二月初八日擊賊於陳家紙
坊克之又擊之下寺灣踞村之賊搜殺畧盡而村外巖

洞十餘處穴山臨水嵌空陡峻僅鳥道一線可通實爲
匪衆逋逃之藪劉端冕飭各弁丁保升而上甫及巖口
賊礮石紛下登時中傷數名副將張復盛攀登仰攻復
中石暈跌巖下劉端冕親督各營弁丁冒死衝上前者
隕下後者復進賊始敗潰巖洞以次平燬計斃賊二百
餘名生擒張保兒等三十餘名奪獲軍械無數是夜隨
據探報董志原回逆數千已由新集將台東竄劉端冕
遂率隊於初九日馳回甘泉初十日列隊高家哨時賊
馬步蜂擁而至瞥覩官軍步賊退立山岡馬賊逕前搏

戰副將王開福都司盧華前直衝賊陣中鎗陣亡賊合力猛撲官軍屹立不動鎗礮連轟子如雨注賊勢不支官軍大呼乘之步賊先奔馬賊繼潰仍由將臺一路飛馳而去同時復有回騎數百由交口槐柏鎮竄入上曹村片股擾及三义河並有大股由太白鎮竄麻子街以出甘泉勞山十三日劉端冕飭知縣邵杜總兵文明章率前營東出洛川以攻上曹村令副將劉竹田率鎮西營南出秦關以剿三义河自率中左右後各營分駐甘泉勞山麻子街以防大股竄入一面函請統領武威軍

道員魏光燾會師助剿十九日賊前騎數百由府村口
進撲麻子街官軍探報賊騎數千已竄至蘇家河廟嘴
一帶劉端冕知大股踵至慮勞山兵單遂自率各營星
夜馳剿二十三日黎明登高瞭視廟嘴以至勞山十餘
里塵埃蔽天知回衆大至比飭先鋒馬隊及後營由大
路迎擊左右兩營循山左繞進禦賊包抄而自率中營
由河干橫截而出部署甫定賊數百騎已馳騁而來步
賊繼至後營列方陣以進鎗礮環擊賊不敢進先鋒馬
隊突前衝之中營復自河干截出前賊敗走而後賊復

蜂擁而至已革鄜州都司張鵬程躍馬陷陣中鎗遽殞
賊乘勢猛撲我軍鎗礮並擊斃賊數名賊死拒不退自
辰至午相持未下維時劉端冕所派之前營邵杜文明
章已率隊掃蕩上曹村股匪並剿平土匪鄒光連聞旁
山有警卽拔隊星馳適從賊後掩擊而至而左右兩營
亦同時擊敗包抄之賊由山左突出前後夾擊賊大敗
奔潰官軍縱橫壓擊計其殺賊五百餘名生擒張慶恒
王八癩子等三十餘名奪獲騾馬三百餘匹餘賊悉向
王家坪一路西竄其前竄三义河另股經劉端冕派令

鎮西營副將劉竹田由秦關馳剿十五日敗賊於苦桐
堡十九日追敗之於陶池二十二日駐師白水適澄城
有回騎數百與前賊會合循洛河上竄已至下乞佛村
魏光燾委從九張兆熊解餉路過突與賊遇張兆熊卽
寄餉堡內而自率百餘人與賊鬥劉竹田聞前途有賊
率所部自白水截出至朱牛鎮鎗礮聲緊乘勢衝入賊
大驚駭劉竹田大呼乘之張兆熊復自內奮勇夾擊賊
大潰我軍追至馬家河賊分路下原循洛河而走劉竹
田急令幫辦劉臣儀率馬隊馳赴上游攔截而自率步

隊沿河跟剿追至馬家河兩岸高原賊不能上劉臣儀
又自上壓擊而下溝中之賊無路奔逃悉爲官軍擒斬
生擒逆目馬化祥解省訊辦此劉端冕一軍劉竹田一
營十二月間痛剿回土各匪迭獲大勝實在情形也臣
等聞土匪陳瘋子卽陳海春與潰勇陳一本沈淮清糾
合逃勇飢民勾結回逆竄擾宜洛各境卽密飭統帶猛
營遊擊張雲松副將張星元就近搜捕十二月初九日
遊擊蔡春榮密約孟家嘴外委李汝淵襲賊於老窰坡
分布勇丁扼住山口自率壯勇直入該逆逃竄無路拚

死格鬥傷我軍十餘人賊亦死亡相繼我軍奮勇衝殺
劉竹田亦率眾踵至助剿逆首陳海春等以次就擒餘
黨百餘人無一脫者正收隊回宜川途次忽聞回騎千
餘屯居縣境東北土基村撫標左軍副前營副將唐寅
清已率隊馳剿張雲松張星元恐其力單卽調齊三營
星馳助之十三日辰刻抵村各勇奮力攻撲唐寅清繞
出村前首尾夾擊斃賊八九十名餘賊北竄張雲松等
督隊追擊沿途均有斬獲日暮收回宜川維時記名提
督郭連昌率卓勝軍前隊陸續赴宜聞前賊北竄已至

甘肅鎮遠商請張雲松留防後路而自率各營並會同唐寅清追剿十七日擊甘肅鎮之賊敗之十九日復擊之雲岩斃賊頗多二十二日追至百尺鎮賊奔竄不及悉脫回撲千總王化成衝入賊隊中矛陣亡賊追撲益勵提督蔡光武總兵李華文等急麾軍排擊而下鎗矛迭施斃前賊數名賊漸披靡會猛營亦出宜川馳至前後夾擊賊大敗西竄官軍分途追殺餘衆四散奔逃悉由延川安定一路竄去此張雲松三營及郭運昌卓勝一軍十二月間剿賊獲勝實在情形也當各軍剿賊甘

廊宜延之交其時董志原回逆適分股由太白山河平
子等鎮東犯而涇南汧隴靈臺各處亦有賊騎竄入多
或千餘少亦數百其從太白山河入者十四日渡惠道
河入安子頭統帶武威軍陝西題補道魏光燾在中部
聞報卽率隊渡河直趨槐柏鎮截剿至則該逆已過槐
柏擾及橋章十五日魏光燾追及之敗賊於石堡川賊
竄要險十六日提督左日升副將伍正得攻要險之賊
賊倚山布陣猛撲直前遊擊史秀成衝入賊中身受數
矛傷登時殞命把總鄭有德力救亦中矛陣亡賊騎四

合副將王正和急率親兵大呼陷陣總兵吳禮德周勝
元率馬隊橫擊鎗矛刺立斬悍賊數名左日升于奇
泮乘勢衝殺賊大潰魏光燕麾軍奮擊斃賊百餘追殺
二十餘里餘賊由街子河一路西竄其從山河走平子
鎮入者十一日至湫波頭十二日至麻園總兵張福齊
率師自職田馳剿十三日賊以數百騎東竄馬欄鎮而
以另股撲底廟牽制官軍張福齊督隊攻之賊未及列
陣總兵蕭寶林周玉堂等突前衝殺縱橫馳驟鎗矛疊
施賊勢披靡副將祝鑑嵩參將劉忠發大呼繼進賊大

敗仍由平子鎮竄回張福齊撤隊回城田卽派徐萬福
黃有本等營東追馬欄之賊沿途探賊已入石門關遂
星夜擊截殺落後賊十餘名前賊策騎飛馳已由照金
鎮一路竄入時甘肅提督高連陞在同官聞報卽整隊
東馳十八日至曹村聞賊已由道賢鎮竄澄城十九日
抵澄則賊已竄至趙村武安村一帶高連陞慮賊騎飛
忽非步隊可及也遂令步軍回防而率馬隊漏夜馳擊
二十日抵趙村天未明官軍一擁而入賊驚起殲除過
半餘賊棄馬奔入武安村賊盡出列隊以拒副將謝春

臺把總張世發怒馬衝入賊並力環刺謝春臺殞於陣
前張世發身受數矛傷力戰不退遊擊桂錫楨急率百
騎由原上抄出村後高連陞督中軍排擊而前再接再
厲賊敗入村口官軍奮威衝入賊大敗繞村而逃官軍
分途追殺桂錫楨亦自村後抄出賊無路走悉棄馬滾
溝而下官軍乘之殺斃跌斃之賊無數餘賊翻溝奔上
咸和原連夜竄走榆樹河二十二日道員魏先薰截之
於丁家原擒斬淨盡此魏先薰張福齊高連陞等軍十
二月間剿回太勝情形也其由董志原南竄涇州之賊

十一日至丁郎十二日破董家堡固原提督雷正綰自
早勝馳擊賊不虞官軍驟至閉門拒守官軍四面環攻
賊礮石雨下官軍被傷十餘名副將余國榮肉薄而登
復中鎗斃命雷正綰督勇從缺口急攻前隊被傷後隊
繼進鎗礮連環轟擊賊不能支退入堡內官軍奪門而
入分途搜殺賊無可逃計堡內賊二百餘名悉殲無遺
並奪獲騾馬百餘匹拔出難民無數其渡涇河由崇信
南竄之賊分爲三股其由靈臺高崖入者約八百餘騎
十六日破瓦子潭踞之十七日員外郎銜中書吳士邁

自鳳翔馳至麻大站十八日昌雪進攻午後抵山下賊
尙未覺總兵朱德樹參將劉厚福等分路上山賊倉皇
拒敵官軍奮勇衝突鎗矛並施登時斃賊數十名賊大
敗竄下山官軍從後躡擊雪深路滑賊顛撲墜巖者無
數官軍跟追二十餘里沿途斬殺三四百名餘賊仍由
靈臺寨子山北竄其由崇信靈臺之間竄入隴州東境
者甘肅按察司張岳齡自汧陽進擊十九日探賊踞麻
家臺約馬三百餘人張岳齡潛師夜起二十一日黎明
馳抵賊巢參將陳泰益大呼直入賊驚覺紛出抵拒官

軍奮威衝殺立斃悍賊十餘賊棄麻家壘而遁官軍乘勝追擊賊回撲數次官軍愈進愈猛賊無可乘遂大敗奔潰追至鎖匙坑又斃賊數十名餘衆悉向齊家塬奔逸其竄入隴州北境之賊十六日攻雷家堡未下試用道候補知府喻步蓮率師援之賊解堡圍而去二十日走胡道村二十二日至韋家堡伐木梯四面環攻二十三日喻步蓮得報星馳賊見官軍復至卽撤圍列隊猛撲直前官軍屹不少動賊稍卻副將劉寶林乘勢衝入蕭羣魁龔曉亭等大呼繼之左右夾擊鎗礮紛下賊死

傷枕籍大敗奔潰官軍追殺十餘里餘賊悉向崇信飛
奔而去此十二月間雷正綰吳士邁張岳齡喻步蓮等
軍剿回獲勝實在情形也傾據延安守將劉厚填刑部
主事周瑞松稟報土匪李雙良高萬全經劉松山剿敗
率衆南竄本年正月初一日其黨尙榜陳明桂擾及西
河溝劉厚填馳至廟店山截之賊恃險抗拒官軍奮力
仰攻鎗礮雨至賊陣亂總兵羅長春副將陳振贊田山
後突入官軍分道上山賊無路走官軍四面環擊陣斬
尙榜陳明桂餘賊擒斬殆盡其宜洛一帶回逆前經郭

運昌張雲松等擊敗而後股尙出沒於宜韓境地正月
初七日竄至白馬灘提督郭寶昌適抵韓城星夜馳剿
距賊數里卽見白馬灘一帶火光甚熾官軍疾馳掩擊
賊驚竄隨據生擒回逆供稱賊後股尙在石堡川郭寶
昌比飭提督王鳳鳴等率馬隊前驅自率步隊由關家
山繞擊初八日黎明抵石堡賊已列隊川上扼險以待
王鳳鳴等逕前衝撲賊死拒鎗矛互擊正在相持適郭
寶昌已繞過關家山率步軍由山口壓擊而下前後夾
擊賊大敗紛竄官軍分途掩殺斃賊二百餘名奪獲騾

馬百餘匹餘衆翻山向延長西北一路竄去此正月初
旬劉厚填郭寶昌剿賊獲勝實在情形也是時延長延
川一帶回逆自上塢由甘泉竄入飽掠將歸前隊已向
甘泉大股尙踞金盆灣等處劉端冕知賊必趨勞山而
情歸之宜急擊也遂伏軍於勞山左右以待之一面函
請魏光燾率師會剿初九日探賊已過臨鎮午後步騎
並至揚旂鳴角紛向勞山大路西馳劉端冕見賊輜重
在後戒各軍毋遽進俟前賊過半突出喻經魁文明章
大呼橫截而出前賊回馬猛撲官軍擊敗之其截斷後

賊亦相顧驚潰拋棄糧食奪路狂奔官軍奮威衝殺躡蹤緊追初十日至劉家屯敗之又敗之於廟嘴擒斬甚衆奪獲糧食二千餘袋騾馬五百餘匹十一日追至岳家屯斬斷後賊百餘名前賊已出府谷一路西竄魏光藻前接劉端冕函報卽拔隊赴甘泉中途忽聞賊自金盆灣分百餘騎竄至太平村初八日至桃源相距僅廿餘里魏光藻移師剿之賊倉卒出敵官軍分路排擊而進四面圍攻村內之賊斬殺淨盡初九日仍擬赴甘泉助剿途次得報知賊已爲劉端冕擊敗仍由勞山走府

村計必取將臺槐樹莊一路回竄魏光燾卽率隊西馳
十一日抵張村十二日抵府村探賊已竄將臺十三日
蓐食擊之賊列隊回拒魏光燾麾軍奮擊縱橫盪決斃
賊無算賊大敗盡棄所掠糧食約向廟耳石廠子兩路
狂奔十四日正擬拔隊窮追忽探報僞胡元帥率黨數
千由府村踵至魏光燾遂分軍伏將臺邀之自率親軍
待敵十五日辰後賊麇至瞥覩官軍步賊卽竄而北馬
賊逕前撲陣官軍奮擊之賊且戰且退追十餘里伏發
官軍從賊陣中突出賊驚潰狂竄委棄糧袋軍械填塞

道路官軍數路追擊擒斬千計奪獲騾駝駱馬千餘匹
所掠糧食盡爲官軍奪回餘賊悉由大白鎮竄回老巢
此正月十五日以前劉端冕魏光燾剿辦歸巢回逆連
獲大勝實在情形也臣等竊維董志原回逆雖迭經剿
敗兇燄漸衰而自延邨迤南以達汧隴賊騎紛紛四出
冒死掠食幾於無日無之官軍非裹糧數日不能盡力
窮追又步騎相懸常有不及之勢土匪董福祥等業已
投誠然敗殘零匪遊騎無歸仍復伏處山巖乘虛竄掠
各弁勇星馳露宿疲饋不遑往往擊回匪而土匪忽來

剿土匪而回逆踵至東西交警羽檄紛馳雖釜底遊魂
終歸撲滅而人數較衆究未能責效於數戰之間臣等
惟當嚴飭各軍迅將北山餘匪一律剿除然後合力掃
蕩而西以紓

聖厯至此次陣亡之副將王開福謝春臺余國榮遊擊
史秀成都司盧華前已革鄜州都司張鵬程千總王化
成把總鄭有德等力戰捐軀均堪憫惜應請
飭部照例議卹已革鄜州都司張鵬程並請

旨開復原官交部照都司例議卹以慰忠魂所有上年

十二月間及本年正月十五以前西南路各軍戰勝情形謹合詞據實馳

奏伏乞

皇太后

皇上聖鑒訓示施行謹

奏
同治八年正月二十三日

榆林綏德一律肅清片

再榆林綏德土匪董福祥倚靖邊鎮靖堡一帶爲老巢自率悍黨數千並分遣賊衆四出竄掠道銜知府署綏德州

知州成定康既隨劉松山轉戰而西忽聞董逆由府谷
神木竄入葭米遂急率隊回州上年十二月十八日師
次何家岔十九日至王家坵探報該逆向東折竄已至
開花寺劉家塢等處逼近黃河成定康卽令陳瑞芝龍
錫慶督率各旗冒雪前進初更抵棘針店距賊尙三十
餘里二十日整隊前行沿途卽遇騎賊數百由右路衝
來經陳瑞芝戴光明喻先恕麾隊衝擊賊卽疾走我軍
追至劉家塢賊萬餘分踞左右山坡嚴陣以待陳瑞芝
卽率喻先恕戴光明由右成光熙率李長樂等由左龍

錫慶率成榮華等由中路策應賊見我軍三路進攻蜂擁來撲陳瑞芝率隊進擊鎗矛刺斃賊數名賊陣未動龍錫慶卽由中路衝出賊死拒喊聲震山谷正在相持成光熙還自左路山下掩至哨官張德榮徐尙清等躍馬上山礮賊先鋒白聯桂賊氣奪李長樂率馬隊縱橫陷陣中右兩路乘勢衝突陣斬黃衣賊曰二名賊大潰追至劉家下塢奪路狂奔我軍分途掩殺斃賊數百名奪獲騾馬四百餘匹窮追二十餘里沿途擒斬無算餘賊向西北竄逸時值高逆餘黨張萬飛自張家臺敗

後乘我軍西剿收合各處餘賊復得數千竄入綏德州
南至王家溝一帶成定康卽飛調各旗隊伍於二十二
日回州二十三日進駐雷家溝二十四日抵王家溝該
逆正攻民寨甚急突見我軍數路掩至步賊大亂狂奔
而馬賊猶復直前抵拒軍功李炳連發一鎗適中狐裘
賊目一名落馬後訊知爲僞幫辦胡梯雲甘肅固原廩
生也賊見匪目就殲無復鬥志各旗乘勝衝殺賊悉奔
潰我軍跟蹤追剿及之於柏樹坪二十五日又及之於
清潤河計其斃賊三百餘名奪獲騾馬百餘匹餘衆竄

向延川二十六日撥及頁河子撫標親兵前營記名提督劉聲集在延川聞報卽率隊馳剿陣斬紅旗賊日數名賊敗走我軍跟追十餘里斃賊甚多餘賊悉翻石山坡西竄此成定康一軍十二月下旬進剿州南各匪兩獲大勝及劉聲集一營截剿獲勝實在情形也現據劉厚基成定康稟報榆林綏德已一律肅清謹附片陳明仰慰

慈廬伏乞

聖鑒訓示施行謹

奏 同治八年正月二十三日

軍機大臣 字寄同治八年正月二十九日奉

上諭左宗棠等奏西南路各軍剿辦回土各匪叠勝暨
榆林綏德一律肅清各摺片覽奏均悉上年十二月間
劉端冕一軍由鄜州至新集將臺等處分剿回土各匪
連獲大勝宜洛一路賊匪亦經張雲松郭運昌等分途
追殺其東竄太白山河等鎮南竄涇州回股叠爲魏光
燾雷正綰等軍擊敗本年正月間劉厚填郭寶昌等復
將延安土匪宜洛回逆痛剿延川延長歸巢回逆並經

劉端冕等追擊擒斬甚多剿辦尙爲得手卽著左宗棠等督飭各軍乘勝跟追大張捷伐宜擾蔑米綏德之董福祥張萬飛各股經成定康等疊加截剿榆綏現已肅清該處兵勇自可調赴西路併力進攻著該大臣等斟酌情形將現在如何布置之處詳悉具奏西征一事必左宗棠督軍前進將士更易爲功著卽將省防事宜妥爲料理一面厚集兵力剋期出省節節掃蕩陝甘逆回蔓延已久該大臣務當一鼓作氣連奏廓清之效諒不待朝廷再三敦促也其榆綏兩屬善後事務著劉典嚴

飭地方官加意經理並著該大臣行知金順仍遵前旨
回紮靖地一帶以資堵剿董福祥是否投誠此次片奏
何以又有董逆由府谷神木竄入葭米之事卽著查明
具奏陣亡之副將王開福謝春臺余國榮遊擊史秀成
都司盧華千總王化成把總鄭有德均著交部照例議
卹已革都司張鵬程著開復原官交部照都司例議卹
將此由六百里各諭令知之欽此